

ake hoki i roto i a korua tamariki he "Tetekura" waimarie ake i to tane kua wehe atu i runga i tena huarahi he.

E whakaatu ana tenei i te pai o te whakaropu haere i a tatou i tena wahi i tena wahi ahakoa he aha te iwi, te hapu, te haahi, nga whakapapa ranei, na reira e nga Toa Takitini, e nga kai korero o to koutou pepa, tohaina enei tu ahuatanga ki o tatou marae maha, a ka awhina mai i tenei o koutou patu-watawata hei reo hei mokai pikau mo a koutou whakaaro maha mo nga tikanga e piki ake ai te iwi ki te maramatanga ara rawa ia mo Te Whakapono.

TE MATE TAIPOPIWA

Kei te hakirikiri ake kua ngau haere ano te mate Taipo-piwa nei kei roto o Heretaunga otira o te mutu katoa. E wha nga mea kua tae kei te hohipera, engri kore ano he mea i tangohia atu; e kiia ana na te mahi pokapoka nei i penei ai te ngawari o te paanga mai. Kua whakahautia ano kia pokapokatia nga tangata o Heretaunga nei. Ko te hiahia kia ngwari te iwi ki te tuku i a ratou me a ratou tamariki kia peratia. Te hunga i marama ki to ratou oraititanga i nga tau e toru ka pahemo nei, i haere ai a Takuta Te Rangihiroa, me nga mema o nga Kaunihera Marae, me a ratou Naahi ki te pokapoka haere, otira i Heretaunga rawa nei me Te Ratana pa. e tika ana kia ngawari rawa mai mo tenei putake. Na konei ka whakaatu kia manaakitia mai nga Takuta nga Kaunihera Marae, nga Naahi e haere ana i roto i nga rohe koira te putake.

Hei aha te whakarongo atu ki etahi tu pakeha maori ranei e whakatoi ana ki aua mahi, ko te ora mo te iwi e ata whakaaro, ka manaaki i tenei whakahau.

"TE MANU KAIRAKAU E PATUA I WAHIKE"

"TENA KO TE MANU TAUPUA E PATUA I TE KAAINGA
(Na P. H. Tomoana)

He whakatauki enei i whakahuatia e Pareihe i mua tata atu i tona hekenga atu ki Nukutaurua me nga iwi o Heretaunga nei i te mea e pokia ana ratou e nga tauamaha o te mutu e whakaeke ana ki te tango i Heretaunga hei kaainga mo ratou. He poroporoaki ka puta enei kupu atahua i tenei kaumatua. E tika ana hoki kia whakatepea etahi korero e peka ana ki enei tu korero hei whakaohoho haere me kore e mauria e etahi o tatou hei whaka-wairakau mo nga pitopito korero. I raro tenei whakaupoko ka watea he whakaputanga i nga pa whawhai i patua ai nga iwi o Heretaunga nei e nga iwi